



Sud Bosne i Hercegovine
Sud Bosne i Hecegovine

Broj: S1 3 IŽ 038166 20 IŽ
Sarajevo, 26.10.2020. godine

IZVORNİK

Sud Bosne i Hercegovine, u vijeću Apelacionog odijeljenja sastavljenom od sudija Srete Crnjaka kao predsjednika vijeća, Dinke Bešlagić-Čovrk i Vesne Trifunović, kao članova vijeća, odlučujući o žalbi Damira Martinovića, Wegscheider Str. 56/EG/1, 4020 Linz, Austrija, izjavljenoj protiv Odluke Centralne izborne komisije Bosne i Hercegovine broj: 05-1-07-1-998/20 od 01.10.2020. godine o odbijanju upisa u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine, u nejavnoj sjednici, održanoj dana 26.10.2020. godine, donio je

R J E Š E N J E

Žalba se odbija.

O b r a z l o Ź e n j e

Odlukom Centralne izborne komisije Bosne i Hercegovine, broj i datum navedeni u uvodu, odbijen je upis u izvod iz Centralnog biračkog spiska za glasanje izvan Bosne i Hercegovine za Lokalne izbore 2020. godine po podnesenim prijavama do 01.09.2020. godine, jer nisu ispunjeni uslovi propisani odredbom člana 3.15 stav 1., 2. i 3. Izbornog zakona Bosne i Hercegovine. U odnosu na žalitelja odbijen je upis iz razloga što uz prijavu nije dostavljen validan dokaz o identitetu.

Žalitelj je protiv navedene odluke blagovremeno izjavio žalbu zbog povrede odredbi člana 1.4. stav 1. i 1.5. stav 2. Izbornog zakona BiH. Navodi da se njegovo ime ne nalazi na popisu u odluci Centralne izborne komisije BiH, iako je dostavio uredno popunjeni prijavni obrazac PRP-1, kao i važeći identifikacioni dokument i uvjerenje o državljanstvu. U prilogu ponovo dostavlja dokumentaciju, te moli da mu se omogući glasanje putem pošte izvan BiH na predstojećim lokalnim izborima.

Centralna izborna komisija Bosne i Hercegovine u odgovoru na žalbu navodi da uz prijavu nisu dostavljeni svi potrebni podaci koji se odnose na validan dokaz o identitetu, zbog čega predlaže da se žalba odbije kao neosnovana.

Ispitujući pobijanu odluku u okviru žalbenih navoda, vijeće Apelacionog odjeljenja Suda Bosne i Hercegovine je zaključilo da žalba nije osnovana.

Prema stanju u spisu ovo vijeće konstatuje da je Centralna izborna komisija BiH, prije donošenja ožalbene odluke, a prilikom razmatranja prijave za glasanje izvan BiH dostavljene dana 31.08.2020. godine putem e-mail adrese hrvatiuskoplja20@gmail.com, pravilno uočila da podnositelj prijave nije dostavio validan identifikacioni dokument.

Postupajući na način opisan u prednje utvrđenom činjeničnom stanju, podnositelj žalbe je postupio suprotno odredbi člana 3.15 stav (1) Izbornog zakona BiH („Službeni glasnik BiH“, broj 23/01 do 31/16), kojom je propisano da državljanin BiH koji privremeno živi u inostranstvu, a ima biračko pravo u skladu sa Zakonom i koji je upisan u Centralni birački spisak, da bi se nalazio u izvodu iz Centralnog biračkog spiska za glasanje van BiH, dužan je da za svake izbore podnese prijavu Centralnoj izbornoj komisiji BiH. Prijava mora biti zaprimljena u Centralnu izbornu komisiju BiH prije roka koji odredi Centralna izborna komisija BiH, u periodu nakon raspisivanja izbora. Uz popunjenu i potpisanu prijavu podnosilac prilaže i dokaz o identitetu i podatke o tačnoj adresi u inostranstvu, te izjašnjenje o opciji glasanja u diplomatsko-konzularnom predstavništvu ili putem pošte.

U konkretnom slučaju žalitelj uz prijavu nije dostavio sve potrebne i propisane podatke, obzirom da nije dostavio neki od važećih dokumenata u BiH (ličnu kartu, vozačku dozvolu ili BiH pasoš), nego samo fotokopiju pasoša R Hrvatske, a što se nikako ne može smatrati validnim dokazom o identitetu, u smislu odredbe člana 5.12 stav (4) Izbornog zakona BiH.

Takođe, žalitelj je imao mogućnost da se putem internet stranice i info linije Centralne izborne komisije BiH informiše o statusu njegove prijave i na taj način otkloni navedeni nedostatak, koji se ogleda u činjenici da nije dostavio validan dokaz o identitetu.

Napomene radi, žalitelju nije oduzeto biračko pravo za Lokalne izbore 2020. godine, nego samo mogućnost glasanja putem pošte izvan BiH, jer isti može glasati na redovnom biračkom mjestu u općini u kojoj ima prijavljeno prebivalište u BiH.

S obzirom na navedeno, po ocjeni ovog vijeća, pobijana odluka Centralne izborne komisije Bosne i Hercegovine je pravilna i zakonita, a žalba neosnovana, pa

je istu, primjenom odredbe člana 81. stav 1. Zakona o upravnim sporovima Bosne i Hercegovine (Sl. glasnik BiH br. 19/02 do 74/10) valjalo odbiti.

PREDSJEDNIK VIJEĆA
S U D I J A

Sreto Crnjak